

四庫全書

史部

欽定四庫全書

皇朝文獻通考卷一百五十

王禮考 二十六

山陵

臣等謹按漢時始有山陵之名諸陵皆有園寢四時致祭後代因之馬端臨王禮考於國恤之後立山陵一門自初喪至殷奠則入之國恤門自卜宅至虞祭作主則入之山陵門蓋以典禮重大義當

分見也我

朝尊

祖敬

宗之典超軼往古而於

山陵大禮尤為隆備

興京

永陵敬奉

肇祖衣冠之所而

與祖卜兆正中

景祖

顯祖昭穆序列天鍾福地允為發祥所自

盛京則

福陵在東北

昭陵在西遠拱長白山近帶遼水鬱鬱葱葱佳氣所聚
世祖定鼎燕京預定

山陵於遵化州之昌瑞山是為

孝陵而

景陵在其東重巒疊嶂四面環抱用啟佑我萬年有道之

長焉

泰陵在易州之永寧山脈厚力豐堪與昌瑞並峙遵化在

京東故稱

東陵易州在京西故稱

西陵云至於合葬之義昉自成周唐臣嚴善思又言尊者

先葬卑者不得入以卑動尊術家所忌故合葬與

不合葬惟義所在各因乎時我

朝

列聖山陵循古合祔之制而

昭西陵

孝東陵

泰東陵之建則仰承

先志憲古準今允堪垂法萬世者也若夫謁陵之禮與廟

享相表裏

大清通禮列在吉禮今恭載於後以彰
聖朝誠孝之至焉

肇祖原皇帝

興祖直皇帝

景祖翼皇帝

顯祖宣皇帝陵曰

永陵

原皇后

直皇后

翼皇后

宣皇后各合葬在

興京西北十里啟運山自長白山西麓一幹綿亘層
折至此層巒環拱衆水朝宗萬世鴻基實肇於此
天命九年四月建都

東京奉移

皇祖考

皇考

孝慈皇后陵於

東京是時遼陽既定

太祖高皇帝命族弟鐸弼王善貝和齊往至祖居呼蘭哈

達之赫圖阿拉地謁

祖陵及

皇后陵以太牢告祭畢乃奉

皇祖考

皇考

孝慈皇后梓宮昇以黃輿日祭以太牢將至

太祖率諸貝勒大臣軍士出城迎二十里外至皇華亭

太祖及諸貝勒大臣軍士悉俯伏道左俟

皇祖考

皇考

孝慈皇后靈輿過乃起至

東京城東北四里之揚魯山預建

寢殿以安葬焉設太牢焚楮幣

太祖親詣

二祖陵奠酒行禮祝文曰吾征明復

祖

父仇已得遼東廣寧祇移

寢園永安斯土惟我

祖

考仰達

天地垂福祐焉

臣等謹按

國家肇基

興京

肇祖原皇帝

興祖直皇帝

景祖翼皇帝

顯祖宣皇帝陵共一山在

興京城西北十里至是奉移

景祖

顯祖陵於

東京在

盛京城東南百二十里稱

東京

陵

順治八年十一月乙丑封

肇祖原皇帝

興祖直皇帝陵山曰啓運山

景祖翼皇帝

顯祖宣皇帝陵山曰積慶山均從祀

方澤遣多羅貝勒吞齊固山貝子吳達海等祭告是日祭時

日初出啓運山有黃赤青三色雲見從

山陵直冲霄漢

十五年九月壬寅奉移

景祖翼皇帝

顯祖宣皇帝陵於

興京罷積慶山祀典先是十三年六月議政大臣巴

圖魯公鰲拜等言

興京

景祖翼皇帝

顯祖宣皇帝陵自克取遼東後遷至

東京原以便展謁申祭享也今據欽天監地理官奏

稱

興京

皇陵風水實係第一福地請仍遷

景祖

顯祖陵於

肇祖原皇帝

興祖直皇帝陵傍庶與風水有合等語夫果旺氣所鍾福

祥攸萃宜如所請將各

陵界內墳墓房屋俱應遷移被圍地畝應交戶部撥補得
旨東京

二陵自

太祖

太宗時擇吉恭遷安奉已久展謁致祭孝慕可申今以地
理之言又議遷移恐未合理況本朝誕膺

天眷國運昌隆移

陵東京之後肇基一統垂裕萬年言乎福地允為至善至

於週圍界內臣民墳墓安集已久議令改遷亦屬未協
其另議以聞久之諸大臣等復言

陵寢風水所在今議將

東京

二祖陵遷祔

興京於理為協

詔從之至是恭移

景祖

顯祖陵改祔

興京

祖陵安奉地宮

十六年九月辛巳尊

興京

祖陵曰

永陵

御製

肇祖原皇帝碑文曰粵稽書稱觀德詩詠發祥莫不由本
支而溯厥初生祇享假以垂夫來葉既隆報本之典亦
昭受命之符洪惟我

肇祖原皇帝暨

原皇后德合天地功配陰陽似后稷聿始周模同帝嚳肇
開唐業啓迪

列祖雄圖衍百禩家傳默祐冲人大統懋九圍帝業顧瞻
陵廟彌嚴祇敬之心鐫勒碑銘益篤靈承之慶卜年卜世

光華宣著千秋以祀以禋繼述遐昌奕代昭垂有永申
錫無疆

御製

興祖直皇帝碑文曰稽承家之遐慶溯開國之鴻圖積德
累仁發祥有自肇基垂統錫祉無疆洪惟我

興祖直皇帝暨

直皇后誕樹厥德聿宣乃武雖大勲未集而經綸已建當
草昧初開而謨烈允光令緒昭垂皇圖式啓迨予冲人

承茲丕緒涖九土之率從合萬邦之愛戴

陵原重建洽篤祜之歡心

廟貌鼎新彰開天之盛烈永錫遐祚萬禩承庥

御製

景祖翼皇帝碑文曰粵稽祖德攸崇爰啟承家之緒宗功
有永益隆篤祜之恩蓋追盛業以溯開天宜紀鴻勲以
昭受命既彰發祥之有自更申錫福之無疆洪惟我

景祖翼皇帝暨

翼皇后弘謨大烈厚澤深仁雖未集耆定之勲而不宣有
象實始建經綸之業而式廓用光令緒丕昭已見六州
歸命皇圖肇造先占率土傾心

原廟重新弓劍衣冠皆起羹牆之慕

山陵永奠子孫臣庶咸蒙佑啓之仁爰勒豐功作本支之
百世載揚休烈錫嘉祉於千秋繼述遐昌昭垂不替

御製

顯祖宣皇帝碑文曰蓋聞天肇一代之運必著開先啟後

之勲聖垂百世之模必有積德累仁之實丕基方建締
造惟勤大業式弘駿鴻宜勒用申報本之典益彰受命
之符洪惟我

顯祖宣皇帝暨

宣皇后文謨丕顯武烈載揚星流華渚已東赤日之祥電
繞辰樞更兆神龍之瑞雖皇猷肇啟大勲未遍於寰區
而帝緒昭垂聖德實留於奕禩橋山載闢百千載無斁
明裡

原廟重新億萬年用鐫令烈承庥有永祐祚無疆

壬午以尊稱

四祖陵為

永陵遣官告祭

十八年尊稱

永陵饗殿曰

啟運殿門曰

啟運門立

景祖翼皇帝

顯祖宣皇帝

永陵廟碑

康熙元年奉安

四祖

四后神牌於

啟運殿

臣等謹按

永陵寶城周十有五丈四尺前饗殿三間曰

啟運殿東西配殿各三間外為紅門繚垣四十二丈七尺

碑亭四

陵內

肇祖原皇帝惟謹藏衣冠

興祖直皇帝奉安龍脈正中

景祖翼皇帝

顯祖宣皇帝列昭穆左右

興祖寶鼎前生瑞榆一株輪囷盤鬱圓覆

佳城

皇上謁

陵時

御製神樹賦紀之

太祖高皇帝陵曰

福陵

孝慈高皇后合葬在

盛京城東北二十里天柱山近則渾河環於前輝山
興隆巔峙於後遠則發源長白俯臨滄海洵王氣
所鍾也

天聰三年二月丙申建

太祖高皇帝山陵工成遣官詣

東京奉安

孝慈高皇后梓宮合葬初

太宗文皇帝諸貝勒大臣敬卜吉壤建造

山陵

太祖高皇帝梓宮安葬至是定議卜吉於瀋陽城東二十

里渾河北石嘴頭山遣官詣

東京奉遷

孝慈高皇后梓宮合葬

己亥奉移

太祖高皇帝

孝慈高皇后梓宮安奉

山陵是日清明節丑刻

太宗文皇帝率諸貝勒大臣詣

太祖高皇帝梓宮前行告祭禮奠酒舉哀焚楮幣讀祝畢
太宗與諸貝勒親奉

太祖高皇帝梓宮出殿諸大臣奉安靈輦列鹵簿奏樂八
旗諸臣以次恭昇

龍輅至

山陵奉

孝慈高皇后梓宮合葬葬畢焚楮幣以祭設官敬謹守護陵東西兩傍立下馬坊

八年十月己丑建造

太祖山陵寢殿

崇德元年四月丙戌尊

太祖高皇帝陵曰

福陵

順治元年二月戊子以

太妃博爾濟錦氏祔葬

福陵

十二月庚午恭上

太祖武皇帝

孝慈武皇后冊寶於

福陵

八年十一月乙丑封

福陵山曰天柱山從祀

方澤

康熙二年九月癸酉改遣

福陵地宮十二月辛酉工成安奉

太祖高皇帝寶宮設

寶座

神牌於享殿

隆恩殿內供奉

神牌及神龕寶牀衾褥帷幔輝施均照

太祖成式製造

三年正月癸巳恭鐫

太祖高皇帝尊諡於

福陵前石碑

二十七年十二月甲辰恭建

福陵神功聖德碑

聖祖仁皇帝御製文曰惟

天眷佑下民綏靖方域篤生我

皇曾祖太祖高皇帝肇興東土奮師一旅式闢皇圖大
武布昭深仁洋溢用造我國家萬億年丕基駿德鴻
功於燦顯懿駕軼亘古予小子纂承洪緒既奉冊寶
宗上

尊諡載輯徽猷炳垂方策惟

陵寢宜有功德之碑敬述大畧永勒貞珉叙曰

太祖承天廣運聖德神功肇紀立極仁孝睿武弘文定業
高皇帝姓愛新覺羅氏諱廟諱先世發祥長白山之陽

禎符神貺歷著休徵至

皇始祖肇祖原皇帝式廓舊業寢熾寢昌又五傳至

顯祖宣皇帝世濟其勤流長積厚景運懋集神器攸歸誕
啟我

太祖高皇帝

顯祖之長子也

宣皇后娠十有三月乃生龍顏鳳目豐頤大耳天表玉立
舉止非常少不飲酒嬉戲稱為聰睿貝勒及長騎射絕

倫雄畧蓋世用兵無敵而又至誠御物大度容人先是有望氣者言滿洲將生聖人統一諸國至是滿洲長白山及東海扈倫諸部落爭相雄長癸未春蘇克蘇滸河部圖倫城有尼堪外蘭者陰搆明軍首逞大難於我時太祖皇帝年二十有五泣血誓師枕干問罪以遺甲十三副攻尼堪外蘭克圖倫城復攻之於甲板誅諾米納奈哈達取薩爾滸城時異已猜忌包藏禍心伺間竊發天威所懾罔弗獸驚鳥散遂俘兆佳城長李岱取馬兒墩

平定棟鄂哲辰渾河等部丙戌秋擒斬尼堪外蘭於額爾渾城戎首服辜先聲震疊環境諸國相繼削平既而葉赫哈達烏拉輝發科爾沁國錫伯封勒察珠舍哩訥殷路九姓之國合兵三萬人分道來侵偵者夜告

太祖皇帝安寢達旦蓐食濟師殲其渠首餘部皆潰斬級四千獲馬三千匹鎧胄千副羣方讐服乃增築城墉修飭法制創制國書開金銀鑛鐵冶所產蠙珠織皮通厥貿易財用殷阜肇立軍制師律精嚴國勢日盛丙午冬

蒙古五部落尊

太祖為神武皇帝歲時朝貢絡繹相望而哈達輝發烏拉
數渝盟先後征討悉定其地每當行軍輒見五色雲亘
天祥光四塞立奏鉅功遠邇翕服益四旗為八設固山
梅勒甲喇牛錄額真遞相統轄命佐領下各出牛種屯
田積穀貯倉置理政聽訟大臣緩刑慎獄野無剽竊路
鮮拾遺國中大治帝業已成貝勒大臣集議勸進丙辰
春王月恭上

尊號曰

覆育列國英明皇帝建元天命時年五十有八越二年定策征明明政久弛棄絕和好援我仇讐蕩搖我邊陲於是誓告有衆類帝禡旗而行遂入拔撫順降臺堡五百所繼下清河明大舉稱兵會於瀋陽號四十七萬張左右翼左翼以杜松王宣趙夢麟張銓由渾河出撫順關馬林麻岩潘宗顏由開原合葉赫兵出三岔口右翼以李如松賀世賢閔鳴泰由清河出鴉鶻關劉綎康應乾

合朝鮮兵出寬奠口向棟鄂四路來侵

太祖皇帝分精騎奮擊大破其衆五日而悉殲之城界凡
取開原破鐵嶺滅葉赫五年克遼陽瀋陽定議建都始
築東京尋取廣寧拔撫順十年遷都瀋陽由是東漸海
西訖遼南及朝鮮北暨嫩烏龍江以至使犬諾落諸路
罔不臣服

太祖皇帝神武天錫決幾制勝變化若神每戰輒單騎深
入裏創新馘神色不動善駕馭雄材推心置腹撫納降

附棄捐忿隙恒予擢用法所當坐雖親昵罔所私攻拔
城邑嚴禁軍士安輯居民是以羣策競奮率土思歸御
極以後拓地開疆日不暇給而躬勤於聽覽留神於載
籍修德納諫親賢遠奸建二木於門俾下情欲達者書
之以進尚寬大崇節儉睦宗親厚風俗重農桑賑窮乏
垂示典訓蕩平正直允為萬世法程猗歟盛哉天命十
一年八月庚戌崩

聖壽六十有八在位十有一年天聰三年二月己亥葬

福陵天柱山崇德元年四月上

尊諡曰

承天廣運聖德神功肇紀立極仁孝武皇帝廟號

太祖康熙元年四月加上

今諡於戲有明德衰海寓板蕩之時生民顛隲之會我

太祖皇帝應運蹶生手提天戈披榛辟莽櫛風沐雨掃邊

陬如破竹定遼左若建瓴戡亂求寧非富天下功極於

配

天道隆於昌後歷稽曩代創業垂統之君未有邁此締造
憂勤經綸宏遠者也瞻赫濯之如新撫承平之永賴歌
思先烈曷罄名言謹拜手稽首而作頌曰

天造大邦勃興東極長白山高苞符開闢鳥生商履武
誕稷奕葉炳靈肇基王迹

太祖龍飛旋乾轉坤齊徽炎昊比烈義軒時惟草昧陟嶽
降原一成奮起雷動雲屯蠢爾仇方敢作牙孽赫斯一
怒恭行天罰寢甲枕鞍神勇迅發巨憝授首戎心式遏

奇謀侔儻遠畧深沈內構者挫外訖者擒單師十百摧
彼強鄰九邦潰糜四路掃塵攜貳則誅歸誠則撫義問
宣昭仁施恩普大畏小懷實揚我武來庭來王日闡疆
土疆土既闢歷數在躬膺圖受籙響應景從三才協軌
百靈潛通指麾蕩滌振落發蒙覘敵烏集濟師冰泮夾
日貫月卿雲紉縵不義是征功成為斷秉鉞稱干

帝心厭亂環山負海風靡雲披朱旗疾捲汗馬爭馳後我
斯恂歌舞迎師紀元頒朔建策開基爰定軍營森羅鷺

鶴步伐止齊并牧相扞爰建國都屹峙屏翰扼吭拊背
皇居攸煥爰命分職勗哉臣鄰爰慎折獄恤哉祥刑爰
達民隱鞫鐸重陳爰制國書科斗更新訏謨孔彰風規
渾噩禹誓湯征千秋繼作聲靈覃敷東西南朔大統迺
膺新命迺廓既詒既翼如鎬如豐九圍是式萬國來同
卜年卜世惟

太祖功巍巍蕩蕩昭格蒼穹右享郊壇敷時思繹炳耀圖
書輝煌球壁景瞻

福陵神卽是宅百川紫朝羣山拱揖葱龍王氣松楸鬱蒼
玉衣永鎮弓劍長藏億載顧慕春露秋霜樹茲穹碑錫
嘏無疆

太宗文皇帝陵曰

昭陵

孝端文皇后合葬在

盛京城西十里隆業山自城東北疊巘層巒至此而
寬平宏敞有包羅萬象統御八荒之勢遼水右迴

渾河左遶輪囷葱鬱洵永固之丕基也

崇德八年九月建

太宗文皇帝山陵工成壬子奉移

太宗文皇帝梓宮安奉

山陵寢殿

順治元年八月丙寅尊

太宗文皇帝陵曰

昭陵恭奉

寶宮安葬

昭陵

十二月庚午恭上

太宗文皇帝冊寶於

昭陵

七年二月戊子奉移

孝端文皇后梓宮合葬

昭陵



八年十一月乙丑封

昭陵山曰隆業山從祀

方澤

康熙二年九月癸酉改造

昭陵地宮十二月甲寅工成安奉

太宗文皇帝寶宮設

寶座

神牌於饗殿

三年正月癸巳恭鑄

太祖文皇帝尊諡於

昭陵前石碑

二十七年十二月甲辰恭建

昭陵神功聖德碑

聖祖仁皇帝御製文曰

天以神器畀我國家洪惟

皇祖太宗文皇帝智勇神聖光昭

太祖高皇帝丕緒帝紘皇綱是廓是恢幹不庭方構造鴻業垂裕

皇考世祖章皇帝大一統之基貽億萬禩無疆之休惟予小子纘承

聖緒念

陵寢宜有功德之碑敬勒貞珉昭示無極叙曰

太宗應天興國弘德彰武寬溫仁聖睿孝隆道顯功文皇

帝諱

太祖承天廣運聖德神功肇紀立極仁孝睿武弘文定業
高皇帝第八子也

母孝慈昭憲敬順慶顯承天輔聖高皇后生而神靈徇齊
明敏龍行虎步顏如渥丹嚴寒不栗舉止非常

太祖皇帝特鍾愛焉既長英武豁達孝弟恭敬慈愛和順
秉心寬弘好觀書史一有聞見終身不忘沈幾果斷羣
望攸屬天命十一年八月

太祖皇帝升遐諸貝勒大臣咸推我

皇祖才德冠世宜繼承帝業以九月朔嗣登大位建元天聰時年三十有五踐阼之後愛養人民撫綏中外崇儉務本修政任賢仁聲義問無遠弗屆除惡討貳用整六師迺擊蒙古執一十四貝勒奏凱八纛下迺征朝鮮克義州進拔漢山城入安州抵平壤朝鮮王李倬遁江華島遣其弟覺來行成遂盡反所收地與盟而還迺征察哈爾剪多羅特部落編俘獲為氓迺伐明自遵化臨北京畧良鄉斬其將滿桂孫祖壽擒其將黑雲龍麻登雲

還拔永平迺收大凌河降其將士於是孔有德耿仲明等航海來歸迺征黑龍江瓦爾喀下之察哈爾舉國來附獲歷代帝王傳國之寶天聰九年冬羣臣勸進

尊號

皇祖辭讓再三明年四月表上

尊號曰

寬溫仁聖皇帝建國號大清改元崇德告於

皇天后土追王

列祖上

太祖高皇帝

高皇后尊諡羣臣咸上表賀乃錫宴肆赦是年朝鮮毀盟
討之拔其都載飛舸於車凌江華島李倭自縛請為臣
釋之還并歸其俘獲朝鮮感服勒石南漢以銘勲德遂
率水師渡海克皮島既而大出師遣將毀關入分左右
翼由涿州界地至山西界復自臨清渡河破濟南克城
四十有九降者八與明兵五十七戰皆捷六年圍錦州

入其郛洪承疇以兵來援

皇祖陳師於松山杏山之間明兵號十三萬望見

皇祖張黃蓋往來指揮皆懼謀夜遁我師分道急擊連大
破之擒承疇降祖大壽錦州松山杏山悉下又命將入
關破兗州東抵寧海克城八十有八降者六陣敗明兵
者三十九於是天戈所指罔不率俾黃河之源青海之
濱使犬役鹿之國來賓恐後野駝奇獸黑狐紫貂重譯
來獻聲教之遠功烈之盛古未有也於戲惟我

皇祖克配天心誕膺景命聰明睿知神武不殺懷柔以德
變伐以威大勲用集大猷是程無有內外乃罔不即叙
親九族正百官修明典章誕敷政教隆郊丘廟祀之儀
定頒歷朝會之禮辨鹵簿旂章服御之制聲名文物炳
然弘備釋奠孔子以四子配立文館譯書史於翔鳳閣
俾儒臣記注得失開科目取士諭臣下盡言無隱論功
封兄弟子姪為諸王貝勒外藩蒙古亦論功封爵有差
優禮降臣寄以心膂賞罰詳明斷獄平允綱舉目張仁

至義盡至於審制度定律令斥邪術禁喪祭踰禮者務
農桑廣漁獵以豐民食皆可為萬世法凡勤勞國事者
賜與必優渥召近臣入宮日至再三講論政事以賓禮
遇之諸國新附之人入見必詢其姓名世系慰勞如舊
識

天語藹然以故雖至難馴者無不悅服如薩哈爾察卦勒
察瓦爾喀呼爾哈諸國素不習禮法亦貢獻稱臣其貝
勒大臣至俱恩遇之如子弟故其部落降者相繼常念

中原生民塗炭欲與明和好惟務修德不樂觀兵屢移
書明邊帥曰朕意在講和不忍無辜赤子慘罹鋒鏑明
之君臣置若罔聞致煩

天討然每出師必諭諸將授以兵律嘗曰明之土地人民
天以與我是民即我民也故師行雖嚴寒不入屯堡士卒
死傷弔問不遺每戰勝攻取符瑞駢集必曰

上天眷佑惕然祇懼克敵必祇告於

廟益敬

天尊

祖勤民若是其至豐功厚澤與天地同久大有國史所不能盡者矣崇德八年八月庚午崩

聖壽五十有二在位十有七年九月壬子葬

昭陵隆業山於戲八音遏密萬國感痛實惟至德深仁為生民主以弘我國家之大寶命愷俊見聞陟降庭止謹述盛概拜手稽首而系之以頌曰於赫

皇祖纘

太祖之緒誕敷乃文孔奮厥武整我師干拓我疆土東奠
朝鮮西讐蒙古貳者獲之服則釋之降則憐之賢則臣
之有言遜志則必過之有言逆耳則必納之治分六曹
職統三院筆簪史臣書譯文館與神為謀以古為鑑制
禮明刑儀章是憲一人有慶肇域四方四方來王自天
降祥和鸞銚銚旗旄央央聿昭茂祉煒燿章光乾符效
珍坤儀開奧既協靈圖誕升顯號濟濟師師羣工舞蹈
歷數攸歸謳歌前導乃禋乃祀於

廟於

郊乃燕乃射於野於朝乃赦乃宥於犴於牢乃漁乃獵於
狩於苗乃命紫宮清寧正中麟趾在右闕雎在東崇政
篤恭翔鳳飛龍文德武功以綏萬邦松山之陰杏山之
下戰士連營崇墉百堵取彼元戎繫之以組肅將

天威救民水火屹屹榆關王師所經而幽而并而冀而青
而兗而徐克其百城涉河踰濟及於東溟時乘以乾帝
出乎震罔有遐邇民莫不信或獻其琛或輸其賁河源

海壖協靈効順有典有則貽萬子孫言為邱墳績婉農
軒佑我

皇考大啟幅員允

皇祖之德

皇祖之勲瞻仰

昭陵在盛京之北雲霞所棲松柏斯植有穹者碑昭宣世
德第祿來崇時萬時億

孝莊文皇后陵曰

昭西陵在遵化州昌瑞山

孝陵之南

康熙二十七年四月己酉奉移

大行太皇太后梓宮於

暫安奉殿先是二十六年十二月壬申

聖祖仁皇帝諭大學士內務府總管等曰

太皇太后疾大漸時諭朕曰

太宗文皇帝梓宮安奉已久不可為我輕動況我心戀汝

皇父及汝不肯遠去務於孝陵近地擇吉安厝則我心無憾矣諄諄降旨朕何敢違伏思

慈寧宮之東新建宮五間

太皇太后在日屢曾向朕稱善乃未及久居遽爾升遐今於

孝陵近地擇吉修建

暫安奉殿即將此宮折運所擇吉處毋致缺損著揀選部院賢能官員前往敬謹料理天氣甚寒務期基址堅固

工程完備爾等即傳諭行乃於

孝陵之東南建造饗殿後殿詎日安奉

太皇太后梓宮稱

暫安奉殿

辛酉奉安

太皇太后梓宮於

暫安奉殿

十月

上恭謁

暫安奉殿行禮舉哀乙卯恭上

大行太皇太后尊諡

冊

寶於

暫安奉殿先是正月內閣翰林院詹事府會議恭擬

大行太皇太后尊諡曰

孝莊仁宣誠憲恭懿頤天啟聖文皇后

聖祖仁皇帝諭曰

太皇太后遐升未久祭文內遽改稱

尊諡朕心深為不忍應俟

梓宮奉安昌瑞山後始稱

尊諡以祭至是諏吉行恭上

尊諡禮

雍正二年二月恭定

孝莊文皇后暫安奉殿為

陵寢是月

諭諸王大臣九卿等欽惟

孝莊文皇后躬備聖德

天錫純禧誕育

世祖章皇帝瑞應昌期君臨萬國逮我

聖祖仁皇帝繼

聖嗣統久道化成立萬世無疆之業皆我

孝莊文皇后福德兼隆之所啟佑也康熙二十六年十二

月

慈馭升遐先期

面諭我

聖祖仁皇帝曰我身後之事特以囑汝

太宗文皇帝梓宮安奉已久卑不動尊此時未便合葬若
另起塋域未免勞民動衆究非合葬之義我心戀汝父
子不忍遠去務必於遵化安厝我心無憾矣再四丁寧
言之懇切我

聖祖仁皇帝涕泣受

命爰

諭諸王大臣集議僉同於康熙二十七年四月安奉

梓宮於

孝陵之南為

暫安奉殿迄今三十餘年矣朕惟禮經曰合葬非古也先

儒又云神靈有知無所不通是知合與不合惟義所在

今

昭陵安奉日久若於左近另起

山陵究非合葬之義且自

孝莊文皇后安奉以來我

聖祖仁皇帝歷數綿長海宇乂安子孫蕃衍想

孝莊文皇后在天之靈極為安妥

遺命諄諄

聖祖仁皇帝遵奉三十餘年今朕身任付託之重

山陵典禮理宜斟酌盡善以垂世者莫大於此著諸王大

臣九卿等會同確議具奏辛未和碩康親王崇安等遵
旨議奏

暫安奉殿自

聖祖仁皇帝親受

孝莊文皇后遺命奉安三十餘年景運綿長子孫蕃衍海
宇乂安誠希有之吉兆稽考古禮無必當合葬之
文應即

暫安奉殿定為

陵寢得

旨是著即擇日興工

十一月辛酉尊

孝莊文皇后陵曰

昭西陵

三年二月辛巳以

昭西陵興工遣官告祭

永陵

福陵

昭陵

孝陵

孝東陵

景陵先是翰林院撰擬祭告

諸陵文啟奏得

旨

暫安奉殿建為

昭西陵乃朕仰體

皇考祇承

慈命之孝思也應令撰文詳陳本末達朕繼述之意以告

祭

景陵祭文曰欽惟

孝莊文皇后躬備聖德貽慶垂庥隆

兩朝之孝養開萬世之鴻基及大漸之際面

諭

皇考以

昭陵奉安年久不宜輕動建造兆域必近

孝陵丁寧再三我

皇考恭奉

慈旨擇地於

孝陵之南為

暫安奉殿歷三十餘年我

皇考歷數綿長子孫蕃衍且海宇昇平兆人康阜

世宗憲

皇帝祇紹丕緒夙夜維思古合葬之禮原無定制神靈

所通不間遠近因時制宜惟義所在即

暫安奉殿建為

昭西陵以定萬年之宅兆卜吉於雍正三年二月初三日

辛未動土興工十六日甲申恭移

孝莊仁宣誠憲恭懿至德翊天啟聖文皇后梓宮安奉

享殿恪遵

聖母之遺命仰體

皇考之孝思驗吉兆於己彰考舊章而允合天開地設儲
悠遠之休徵巒聳川迴裕繁昌之慶祚伏乞

聖鑒謹告

甲申恭移

孝莊文皇后梓宮安奉

昭西陵享殿遣官致祭

十一月丙午

世宗憲皇帝詣

昭西陵躬奠舉哀丁未復詣

昭西陵行安奉

地宮告祭禮先是諸王大臣等奏本月十三日

聖祖仁皇帝三周忌辰

皇上親詣

景陵行禮十二月初十日為

孝莊文皇后梓宮安奉

地宮之期

皇上若又親往當此冬令嚴寒一月之內

聖駕兩次往還臣民之心實有未安又今年近京州縣稍

多雨水

皇上正在施恩賑恤之際恐地方官民不無迎候供役請

於躬詣

景陵祭奠之日即於

昭西陵先期行大祭禮

孝莊文皇后梓宮奉移

寶城之日遣諸王大臣前往祭奠得

旨十二月初十日

皇曾祖妣孝莊文皇后安奉

地宮朕本欲親往祭奠但

皇考聖祖仁皇帝三周祭期去十二月初十日甚近一月之內兩次往還天氣嚴寒沿途官民迎候供役未免勞苦朕意正在躊躇覽諸王大臣所奏援引典禮請於十一月十三日先期祭奠於禮既盡於心亦安所奏是著

照此行

十二月癸酉奉安

孝莊文皇后梓宮於

昭西陵

皇朝文獻通考卷一百五十

欽定四庫全書

皇朝文獻通考卷一百五十一

王禮考 二十七

山陵

世祖章皇帝陵曰

孝陵

孝康章皇后

端敬皇后合葬在遵化州西北七十里昌瑞山本名豐臺

嶺亦曰鳳臺山山脈自太行來重岡疊阜鳳翥龍
蟠嵯峨數百仞前有金星峯後有分水嶺諸山聳
峙環抱左有鮎魚關馬蘭峪右有寬佃峪黃花山
千巖萬壑朝宗迴拱左右兩水分流夾繞俱匯於
龍虎峪崇隆鞏固為

國家億萬年鍾祥福地

康熙元年三月庚戌朔建

世祖章皇帝陵稱曰

孝陵先是順治十八年

詔建

世祖章皇帝饗殿

地宮精選識地理人等令內院禮部工部都察院科道官

員率往會擬至是工成設內侍官員兵丁守護

二年四月辛酉奉移

世祖章帝寶宮至

孝陵

五月乙未奉移

孝康章皇后寶宮至

孝陵

六月壬寅奉安

世祖章皇帝

孝康章皇后

端敬皇后寶宮於

孝陵前一日遣輔臣文武三品以上官詣

陵致祭屆日恭奉

世祖章皇帝寶位安設

地宮石牀正中

孝康章皇后寶位安設於左

端敬皇后寶位安設於右畢輔臣跪祭酒衆隨行禮舉哀

各退

癸卯奉安

世祖章皇帝

孝康章皇后

端敬皇后神位於

饗殿致祭是時

饗殿告成稱曰

隆恩殿中一間寢室奉安

世祖章皇帝神位居左奉安

孝康章皇后神位居右右一間奉安

端敬皇后神位均南嚮門為

隆恩門樓為

明樓上懸

孝陵牌匾行奉安致祭禮

世祖章皇帝神位居正中

孝康章皇后神位居左

端敬皇后神位居右均南嚮讀祝奠獻一如時饗儀是年

封

孝陵山曰昌瑞山從祀

方澤

七年正月庚戌恭建

孝陵神功聖德碑

聖祖仁皇帝御製文曰我國家肇基東土

祖功宗德昭格

皇天恢弘景運於萬年篤生我

皇考皇帝睿聖首出奄有萬邦大孝弘仁武功文德配兩

儀而軼千古既奉冊寶恭上

尊謚惟

陵寢宜有功德之碑謹撰述大概鐫諸貞珉用傳永久叙

曰

皇考世祖體天隆運英睿欽文大德弘功至仁純孝章皇
帝

太宗應天興國弘德彰武寬溫仁聖睿孝隆道顯功文皇
帝第九子也

母昭聖慈壽恭簡安懿章慶敦惠溫莊康和太皇太后

皇考未誕之先

太皇太后嘗有紅光繞身女侍驚以為火近則不見衆皆大異之又夢異人授一子曰此統一天下之主也次日皇考誕生宮內紅光照耀香氣瀰漫經久不散

皇考生而神靈英異非常六齡讀書不假師資一目數行俱下

太宗甚鍾愛焉甲申嗣登大寶是時流寇肆逆明祚已終國亡君殉萬姓無歸爰整六師一戰而破百萬之強寇

乃建都燕京齊晉秦豫傳檄底定靖寇救民王師南下
金陵僭號者其臣下執之以降由是下楚蜀平浙閩兩
粵滇黔數年之內以次掃蕩遂成大一統之業治本愛
民師出則嚴紀律毋敢殺掠百姓知民苦賦重盡除明
季加派又停江浙督催織造官免陝西皮張絨褐之貢
罷各省柑橘鮐魚石榴等物之進停止邊外城工蠲派
徵民間助工之餉已臨清燒磚之役減朝鮮進貢之數
定賦役全書修大清律令各衙門規制事例祇奉

太祖

太宗成法治具畢張敬

天尊

祖饗祀親虔孝事

太皇太后晨興問安長跪受教披閱章奏每至夜分勤學
好問擇滿漢詞臣充經筵日講官於景運門內建直房
令翰林官直宿備顧問經書史策手不釋卷遂知性知
天洞悉至道兼綜天文地理禮樂兵刑賦役古今因革

利病之源旁及諸子百家莫不博涉得其要領素衣菲
食不興土木之工親視太學釋奠先師發帑金崇其廟
貌雖太平不弛武備立賢無方丁亥己亥再舉會試間
廣額數以羅人才科場作弊者從重治罪視滿漢如一
體遇文武無重輕破故明人臣朋黨之習尚廉正斥貪
邪時時甄別廷臣以示激勸下詔求言虛懷納諫外官
入覲面諭以愛民勤職詳慎刑獄大辟覆奏再四駁審
命官恤刑各省寬濫者皆得免又停秋決一年閹寺不

使外交立鐵牌示禁命儒臣修

祖宗聖訓順治大訓通鑑全書孝經衍義等書以教天下
臣民詣先農壇躬耕耤田勸農以足民四方水旱災荒
頻發內帑多金賑濟雲貴初平頒發帑金溥賑軍民焦
心勞思惟念軍民疾苦至於故明諸陵設護衛禁樵採
憫崇禎帝死難頒諭祭諫其臣之殉難者予贈卹其宗
室投順者令畜養樂業其厚待如此我

皇考以精明理政務以仁厚結人心法制則細大無遺德

音則遐邇咸徧故使山陬海澨莫不覃被恩膏東至使
虎使犬等國西至厄魯特吐魯番等國北至喀爾喀
俄羅斯等國南至琉球暹羅荷蘭西洋海外等數百國
見海不揚波咸曰中國有聖人出焉梯山航海莫不重
譯來王我

皇考惟是兢業祇慎無一日自暇逸也順治十八年正月
不豫於丁巳日上賓嗚呼哀哉

聖壽二十有四在位十八年葬

孝陵豫定於昌瑞山

皇考遺命山陵不崇飾不藏金玉寶器嗚呼故明政亂久矣

太祖高皇帝

太宗文皇帝誕膺景命定亂無難特以尚德緩兵故也至我

皇考當流寇殘破明室生民塗炭大兵西下掃平逆寇統一寰宇非神武不能開基非至聖不能致治謨烈於昭

道法具在雖堯舜之德湯武之功何以尚茲謹拜手稽首而陳頌曰

天佑下民眷於有德大清受命奄有方域

太祖肇基

太宗弘業

皇考纘緒亶生睿質運協禎符懋建皇極大武布昭剪除寇賊王師西下一戰而克定鼎燕京綏懷反側指日蕩平一統萬國恬冒烝民仁恩洋溢罷貢停工以甦民力

立綱陳紀利興弊革成憲周詳有典有則圖治勵精憂
勞日昃萬幾畢理大猷允塞崇儉去奢克勤無逸敷政
優優居心翼翼丕承遺緒永言孝思先意順志恭事

慈幃好學不倦悟道淵微博綜經史百事周知戒勵臣工
首在勿欺賢奸立辨黜陟咸宜纂成文籍洋洋訓詞金
匱是寶萬世可師慎刑薄賦賑救荒災勸農興學富之
教之帝王道貫履載功齊聲教四訖遐邇不遺殊方重
譯入貢京師治化溥洽道法昭垂休徵駢集洪烈長貽

巍巍

孝陵神爽憑依山苞川拱祥護靈祇鏤詞貞石億禩歌思

孝惠章皇后陵曰

孝東陵在

孝陵之東

康熙五十七年三月壬申奉移

孝惠章皇后梓宮往

山陵

四月乙酉奉安

孝惠章皇后梓宮於

寶城地宮是月奉安

孝惠章皇后神位於

饗殿時

孝惠章皇后山陵禮成並擇吉安葬

皇考諸妃及諸宮人於各墓

隆恩殿中寢室奉安

孝惠章皇后神位左室奉安

悼妃

恭妃

恪妃

端順妃神位右室奉安

貞妃

淑惠妃

寧懋妃神位均南嚮祭日奉

孝惠章皇后神位居中南嚮

四妃神位居左西嚮

三妃神位居右東嚮奠獻行禮與

孝陵同

諸妃奠獻咸用內監

十二月丙辰

聖祖仁皇帝詣

孝惠章皇后陵行期年致祭禮

五十八年二月甲子尊

孝惠章皇后陵曰

孝東陵

禮部等衙門言古來帝后有不合葬而自為陵者
俱就方位定名今

孝惠章皇后陵在

孝陵之東不必另立陵名臣等恭擬尊稱為

孝東陵得

旨是

聖祖仁皇帝陵曰

景陵

孝誠仁皇后

孝昭仁皇后

孝懿仁皇后

孝恭仁皇后合葬

敬敏皇貴妃從葬在

孝東陵之東

康熙十五年二月壬戌建

仁孝皇后地宮興工

臣等謹按

孝誠仁皇后於康熙十三年上

尊諡曰

仁孝皇后雍正元年六月始改上

尊諡曰

孝誠恭肅正惠安和儷天襄聖仁皇后

二十年二月

陵寢地宮成癸卯奉移

仁孝皇后

孝昭皇后梓宮於

陵寢

三月辛酉奉安

仁孝皇后

孝昭皇后梓宮於

陵寢地宮

二十八年十月甲戌奉移

孝懿皇后梓宮於

陵寢

癸未奉安

孝懿皇后梓宮於

陵寢地宮

雍正元年二月丁卯尊

聖祖仁皇帝陵曰

景陵大學士等恭擬

聖祖仁皇帝陵名進呈

世宗憲皇帝哀慟不勝親刺指血圈出

景陵兩字

三月丙午奉移

聖祖仁皇帝梓宮於

景陵先是正月總理事務王大臣等議言謹按宋明之禮
梓宮至山陵嗣帝皆不親送宋時以親王宰相充
之明時或以王子親王主之祈

聖上思宋明定制之深意念

宗廟

社稷之重任以慰臣民之心得

旨凡事當遵奉

祖考已行典禮方為盡善前

曾祖母太皇太后發引時

皇考親自躬送至

祖母皇太后發引時

皇考聖躬違和並有足疾尚且親送

梓宮啓行諸王大臣豈能勸止乎親送

皇考梓宮至

山陵朕意已定大臣等勿再強奏

四月辛亥

聖祖仁皇帝梓宮至

景陵暫安奉

享殿

世宗憲皇帝諭扈從諸王大臣曰朕親送

梓宮沿途於大禮雖獲免闕遺而思慕未有窮期朕欲留

住

山陵數日然後回京諸王大臣務體朕意王大臣等合辭

奏言

聖駕奉

皇太后在此若不回鑾

皇太后亦必愈加哀慟所關甚重懇請仍照原議於祭畢

回京乃從之

八月乙丑奉移

孝恭仁皇后梓宮於

景陵

辛未

孝恭仁皇后梓宮至

景陵暫安奉

享殿是日

世宗憲皇帝謁

暫安奉殿

孝陵

孝東陵行禮舉哀畢遂詣

景陵望見

陵門即長慟至

享殿祭酒行禮舉哀傳諭諸王大臣悉至

聖祖仁皇帝梓宮前衆皆感慟良久乃出至黃幄內祇候
孝恭仁皇后靈駕至

世宗憲皇帝跪迎於碑亭前步從入奉安

梓宮於

饗殿之左蘆殿內列

几筵

世宗憲皇帝祭酒行禮舉哀畢傳

諭曰

皇太后素性謙謹事

聖祖仁皇帝數十年未嘗少懈今暫安奉

梓宮於蘆殿

饗殿內見奉

聖祖仁皇帝梓宮

仁壽皇太后前一應供獻及祭文不可由中門出入皆應

於西門行走以仰體我

皇妣謙冲至意

九月丁丑朔奉安

聖祖仁皇帝

孝恭仁皇后梓宮於

景陵前期一日行告祭禮

世宗憲皇帝詣

饗殿於

聖祖仁皇帝几筵前讀文致祭奠獻行禮次詣

孝恭仁皇后几筵前讀文致祭奠獻行禮畢乃暫出至
隆恩門外幄次竣徹祭品少頃復入於

聖祖仁皇帝梓宮前祭酒奉移時

聖駕前行至

明樓前

蘆殿恭奉

聖祖仁皇帝梓宮奉安於龍輜畢復至

孝恭仁皇后梓宮前祭酒舉哀奉安於

聖祖仁皇帝梓宮之右均北嚮

冊

寶各設於

梓宮兩旁行奠獻禮

命凡

聖祖仁皇帝諸皇子皇孫及向日親近大小臣工皆得入

蘆殿瞻仰

梓宮畢乃出至是日

世宗憲皇帝詣

景陵行奠獻禮欽天監奏吉時屆迺於

聖祖仁皇帝梓宮前祭酒三爵次於

孝恭仁皇后梓宮前祭酒三爵各行三拜禮畢至

陵寢門外向北跪哭以俟諸臣恭率校尉先奉

聖祖仁皇帝龍輅入

地宮次奉

孝恭仁皇后龍輅入

地宮奉安

梓宮於寶牀陳

冊

寶於各石案次請

敬敏皇貴妃金棺從葬掩閉

元宮石門

世宗憲皇帝於祭臺前祭酒三爵行禮舉哀衆隨行禮舉

哀畢乃出是時諸王大臣及各官仰見五色祥雲
自西北起覆於

景陵繚繞不散僉謂

聖祖峻德宏功之瑞應

世宗至誠大孝之感格焉是日大學士等恭題

聖祖仁皇帝

孝恭仁皇后神主畢行虞祭禮

世宗憲皇帝恭奉

神主回京升祔

太廟先是三月乙巳禮部奏言臣等欽奉

上諭詳察題主禮儀今考禮書既葬藏明器下誌石復土堅
築乃題主奉神主升車反室蓋未葬之前事以生
禮既葬之後奉以神道謹議於

梓宮奉安地宮之後恭題

太廟神主禮成奉安黃輿令親王大臣等敬奉回京奉

旨明季帝王皆不親送梓宮故令親王大臣奉主回京朕

既親往若不親奉

神主而歸於心何安竢

山陵事畢題

主禮成朕親奉

皇考神主還京八月乙亥升祔

太廟屆期

命大學士嵩祝等恭奉

神主填青

諭之曰填青典禮所關最重古人必取名望素著德行純粹學問淵深者以充此任今爾等位既貴顯人品皆優是以特加簡命爾等當體朕敬恪之誠潔誠齋戒屏除塵慮儼如

聖祖在

天之靈陟降上下誠意所孚洋洋如在方副朕一片孝思爾等不必有意於哀痛不必有意於儀文只以一誠感格為是是月奉安

聖祖仁皇帝

孝誠仁皇后

孝昭仁皇后

孝恭仁皇后神位於

隆恩殿禮部議

隆恩殿中一間寢室奉安

聖祖仁皇帝神位居中

孝誠仁皇后神位居左

孝昭仁皇后神位居右

孝懿仁皇后神位居左次

孝恭仁皇后神位居右次

敬敏皇貴妃神位於右一間均南嚮

明樓上懸

景陵牌匾每年清明孟秋望冬至歲暮行大饗禮恭請

帝

后神位南嚮

敬敬皇貴妃神位東嚮奠獻行禮均與

孝陵禮同

二年三月乙酉清明節

世宗憲皇帝躬詣

陵寢致祭行上土禮

五年閏三月丁丑恭建

景陵聖德神功碑遣官告祭

世宗憲皇帝御製文曰

皇天眷佑我國家顯謨盛烈世世相承

太祖

太宗肇基東土締構鴻圖

世祖混一寰瀛克成駿業篤生我

皇考皇帝亶神聖之姿立君師之極大德廣運健行不息至
明如日至仁如天集皇王之大成亶古今而首出書契
以來罕有倫比以揚

列聖之耿光以裕我無疆大歷服予小子纘承基緒既奉

冊寶恭上

尊謚山陵禮畢宜建穹碑頌揚功德欽惟我

皇考臨御六十餘年厚德崇功布濩宇宙盈溢簡牒巍巍
乎蕩蕩乎不可殫述謹掇大概鐫勒貞珉用昭垂於億
萬祀叙曰

聖祖合天弘運文武睿哲恭儉寬裕孝敬誠信功德大成
仁皇帝

世祖體天隆運定統建極英睿欽文大德弘功至仁純孝

章皇帝第三子也

母孝康慈和莊懿恭惠溫穆崇天育聖章皇后在妊時

孝莊文皇后見

孝康章皇后衣裾若有龍繞知為毓聖之祥逮降誕之辰
異香盈室經日不散五色光華與日並耀宮人內侍咸
所瞻仰天表奇偉耳大聲洪雙瞳日懸隆準岳聳膚理
瑩白皎然玉質舉止嚴重性度恢宏敦敏聰明出言中
理辛丑正月嗣登大寶時甫八齡

孝莊文皇后問所欲對曰惟願天下乂安兆人樂業共享

太平之福

孝莊文皇后勤容嘉嘆知能荷神器為生民主也自初讀書十行俱下畧不遺忘講幄既開日與儒臣論難往復雖烈暑沍寒未嘗暫輟焚膏繼晷常至中宵遜志覃思好古敏求勤篤甚於儒素譚經評史發揮道奧流覽之功編於七畧爰及緯象聲律算數百家之書莫不觸類洞徹得其精要故知性知天察人倫而明庶物雖一名

一物皆研究精微而一以貫之敬

天尊

祖禋祀必親齋明盛服率禮無怠至踰六十頗艱拜起冬至上辛祫祭羣臣懇請遣官恭代猶必詣

郊

廟省視陳設行迎神之禮退居齋幄默致精誠俟禮畢然後旋輅天性純孝事

孝莊文皇后垂三十年致愛盡誠委曲周至從幸時乘馬

不離左右道路少仄即下馬扶輦踰嶺則扶掖升降彌
加恭謹康熙二十六年冬

孝莊文皇后聖體不豫

皇考親嘗湯藥席地而坐目不交睫衣不解帶者三十五
晝夜逮疾大漸自撰祝詞步禱

南郊請減已算以延慈壽伏地誠懇涕泗交頤至居廬時
哀瘠過甚不盥沐者數十日釋服後仍處偏殿衣布素
恭送龍輜每日必步隨數里朝夕慟戚如初喪終身思

慕每一言及聲淚俱發事

孝惠章皇后垂六十年備極孝養省方江南避暑塞外必奉鑾輿以行康熙四十九年

孝惠章皇后壽躋七旬

皇考亦年近六旬矣正月元夕宮中張燈設宴躬親起舞稱萬壽場中外傳為天家盛世事友愛裕親王等同問安慈寧宮每序家人之禮親親之誼久而彌篤其疾也屢親視之薨也屢親臨之宗室中用其才俊而禮其高

年無爵位者亦有常廩自康熙六年始親政事未明求衣日昃忘食數御門延見公卿詳論得失綜理萬幾日有常程靡所稽滯嘗於巡幸之次章奏未至秉燭以俟或於四鼓披覽達旦遂忘寢息孜孜圖治不自暇逸歷六十餘年終始惟一虛已求言以廣視聽片詞之善必蒙采錄或星象示異水旱為沴即命羣下直陳休咎所起無有隱諱又命督撫諸臣密奏地方利弊所宜興罷者雖在萬里之外周悉情狀視若目前審官班祿必惟

其當內自六卿之屬外自縣令以上臨軒召見觀其可
否然後命之其以清修苦節著聞者立行甄擢以勸有
位介冑之士無大小必親試其能開霽天顏從容詢問
寸長微績並加獎勵人皆感激自奮

聖性天授一經覬謁歷久不忘故文武之選程材使器官
得其人人稱其職

皇考智勇天錫廟算如神三逆未叛之前即燭其終為悖
亂宜早定大計遣大臣趨召之吳三桂果反耿精忠繼

之乃宣睿畧簡禁兵守荊州安慶鎮江為聲勢命諸王
大臣為大將軍分道並進三桂自出至衡州湖南皆陷
王師扼之於岳州用戰艦據江湖斷賊餉道三桂憂怖
死遂拔岳州盡收湖南地由陝西取漢興定四川明年定
貴州又明年定雲南逆孽自焚餘黨悉平精忠兵出仙
霞旁擾溫台大兵遏之衢州屢摧其鋒遂北入仙霞順
流而下精忠自縛軍前溫台賊悉破散尚之信最後反
王師北自韶州東自潮州蹙之之信束身乞降其間孫

延齡陸梁於桂林王輔臣潰亂於寧羗戈鋌所指不久
就俘當賊勢之熾大江以西五嶺以南悉為賊踞烽火
幾半海內

皇考默運神謨不動聲色八載之間再定寰宇廓清氛翳
耿精忠之亂鄭經自廈門盜踞下游三府精忠敗大兵
乘勝復三府經遁歸廈門越二年克廈門經遁歸臺灣
以海舟守澎湖為門戶

皇考決策命師治艤幢以六月乘北風攻澎湖再戰破之

臺灣震驚乞降遂以其地為郡縣海氛起於明季自鄭成功巢穴茲島傳子經及其孫厯三世出沒為閩南患至是悉靖察哈爾部布爾尼者元之遺裔其先世納款獻傳國璽故荷特恩尚主封王父阿布柰漸為狂恣

皇考不忍置之法羈諸盛京俾布爾尼襲封召之不至遂以所部叛遣將率禁旅討之兩月之內殲厥魁渠招撫其衆北藩以寧俄羅斯夙慕德化奉職貢乃其邊人羅刹踞雅克薩城納我逋逃以擾索倫興師徂征拔其城

縱其俘振旅而還會俄羅斯之國王遣使上疏謝罪命大臣往定邊界東北數千里延及海邊胥隸版圖厄魯特者元之牧牲人也其頭目噶爾丹臬桀習戰鬪刦服諸番殘回部數百餘城復與喀爾喀構難潛刦其衆故喀爾喀七旗數十餘萬皆稱臣內附

皇考親巡塞外受其朝謁錫之名爵頒諭兩部落息兵寧人噶爾丹顧頑梗弗率以追喀爾喀為名闌入邊界

皇考計安藩服躬申天討以康熙三十五年春親統六師

由中路直抵克魯倫料賊必逸而西別遣大將由西路
進兵土喇噶爾丹聞天兵至棄其輜重連夜西奔恰遇
西師於昭木多大破之噶爾丹收合餘衆竄伏窮荒其
冬車駕再出至鄂爾多斯遣使招附明年春又出寧夏
循賀蘭山哈密擒其子以獻其族類丹濟拉等潛輸誠
款師次狼居胥山天兵四布噶爾丹勢孤援絕仰藥自
盡丹濟拉攜其遺骸及其子女人口來歸朔漠蕩定其
兄子策妄阿喇布坦素與噶爾丹有隙乘其南發潛據

其地誘致逋逃種類漸滋因圖青海諸部及西域諸番
暗遣人攻拉藏殺之掠據藏地

皇考以

太宗文皇帝時班禪額爾德尼達賴喇嘛知東土有聖人
遣使歸命追念厥誠不可以勿救於是分遣諸將率西
寧諸路之兵自青海入四川雲南之兵自拉里入整旅
前驅不遺一矢遂定藏地復達賴喇嘛之位安西域之
衆其他西番諸國無不欣喜感戴委贄恐後軫念東西

水患屢勤翠華躬視河淮每步長堤或駕小舟周迴觀
覽高下險易瞭若指掌授策河臣罔不奏效開中河以
避黃河百八十里之險治下河則疏人字芒稻河注之
江濬蝦鬚諸溝注之海治清淮則培高堰塞六壩以蓄
其勢開張福口裴家場以暢其流治黃河則浚雲梯關
以通海口築挑水壩開陶莊引河以導其北向築減水
壩修鹽河以洩其旁溢於是淮不東漫而北敵黃黃不
南灌而東越海下河七州縣化浸為沃農桑徧野漕艘

商舶上下數千里安若衽席其在畿輔之內則隄子牙而漳滏滹沱無泛濫開柳全口而蘆溝不橫決皆

皇考頻年巡省面授經畫用迄於成績勤民求瘼凡所在暘雨之期封疆大吏隨時奏聞偶有旱澇無不周知賑恤之恩不稽旬日籌畫詳盡溥遍優渥故雖有愆伏而民忘其災遠至蒙古諸藩並厘

睿慮分遣使臣教以網罟耒耜之利俾知鮮食艱食每聞積雪荒歉即賜之牲畜米糧咸獲贍給康熙三十六年

朝鮮以大饑告截河南漕米由登州汎海發盛京倉貯
合水陸運致數萬石平糶賜賚凋瘵盡起舉國忭慶蠲
租之詔無歲不下所在災傷見告即與減除積年逋負
輒免追征積算無慮億萬計人用底於殷阜四十八年
特勅逋免天下地丁錢糧三歲而徧八埏之內次第霑
被寬仁之澤浹於黎烝隆冬停流遣之期盛夏鮮囹圄
之禁法司奏讞多所矜釋和氣薰陶萬方康泰至於三
藩之亂所全宥不可勝紀明降勅諭尚之信耿精忠罪

大惡極法應及族但念尚可喜耿仲明航海歸誠著有勞績其兄弟俱從寬免罪屬下人有父兄子弟在賊中者一無所問又如噶爾丹子女赦弗誅俾子有室女有家仍官其子自秦漢以降叛逆之條蔓及宗族橫枉無辜

皇考弘曠蕩之恩遂除二千年誅戮慘酷之弊慎茲祥刑復於三代興行教化申之以告誡

御製訓飭士子文刊於學宮

聖諭十六條頒於州縣訓詞深厚丁寧周至士習民風於焉丕變崇敬先師表章前賢東巡守至於兗州親詣闕里致祭孔子拜跪之儀有加於往代廣賢裔博士之封宋儒周邵二程張朱皆稱子而不名升朱子祀於堂壽考作人開鄉會試者各二十有二科髦俊蔚興相繼輩出增江浙入學名數廣直省鄉試解額文思光被苗犵之秀隸籍鬻宮島上君長遣子弟就業辟雍窮山越海靡然嚮風右文稽古命儒臣纂修周易折中圖象卦爻

之蘊親加論定又修書詩春秋傳說彙纂性理精義朱子大全經籍之道煥然大明又親授詞臣考訂律歷歷得合天律諧真度誠萬世不易之法按北極之高測地理南北東西差得皇輿全圖其他所編輯卷帙繁富充於內府聽政之暇喜操翰墨文成典故詩為雅頌書蹟神運天矩為百代模楷闔五鈞之弓射大鏃之矢發則必中中必洞貫文事武備並臻其極所謂天縱之聖又多能也致敬前代禮踰常典自夏商以迄元明帝王膺

歷服者咸入廟而享祀焉前後南巡親祭明孝陵者三
又欲封其後裔俾承世祀予小子祇奉遺言錫之侯爵
公卿大臣戎行將帥多服官至四五十年

皇考眷待耆舊恩禮優渥凡朝會讌享龐眉皓齒濟濟盈
庭三代而下誠為盛典

皇考自幼齡奉

孝莊文皇后慈訓凡飲食起居視聽言動皆有矩度盛德
自然周旋中禮端宸泣政天顏肅穆雖宮庭閒讌一言

一笑不以假人太和元氣充於四體冬不爐而自溫夏
不扇而手足未嘗濡汗正衣冠尊瞻視終日儼乎若思
逮於耄齡聖敬日躋敦尚儉素衣不辭澣濯食不取珍
異宮掖人數至少光祿寺一歲所費較之前代僅十之
一服御器用歷久不易未嘗以故弊棄遺巡幸所至不
煩民間一物宮室舟舫純用樸斲無丹青之飾秉德謙
冲自平定三逆肅清朔漠凱旋告功及五旬六旬

萬壽節五十六十年寶厯國家大慶諸王公文武臣僚太

學生徒京兆耆老屢請恭上

尊號雲集闕下備陳丹懇

皇考頻下諭旨讓而弗居於戲惟我

皇考躬備聖德久道化成風教翔洽錫福烝人胥躋於仁
壽乃至鳥獸草木咸若守成之業恢於創造拓開疆宇
廣袤各數萬里在昔未賓之國重譯踵至戴天履地含
生負氣之倫莫不尊親自有生民蓋莫盛於斯日者然
且兢兢業業緝熙單心敬上天之明威察下民之視聽

焦勞萬務未嘗以天位為樂憂勤惕厲以迄於終身是
所以接堯舜禹湯文武孔子之心傳優入聖域而仁覆
天下也康熙六十一年冬十一月甲午崩

聖壽六十有九雍正元年九月丁丑葬

景陵謹拜手稽首而作頌曰維我皇清

上天眷命二儀凝祉

三朝篤慶

皇考紹烈建中表正亶聰亶明乃神乃聖翼翼昭事仰格

高穹化將道贊祭以誠通虔承

九廟孺慕

兩宮大孝備矣至德光融爰在冲年夙成睿智致泰之基
徵乎言志日就月將古訓是嗜理數兼該窮源抽秘萬
幾在御八表君臨克勤於政無逸為箴晨趨欲起宵漏
已深慮周禹迹事厯堯心廣聽並觀樹旌建鼓靡善不
揚有闕斯補四門攸闢庶官式叙既採珪璋亦羅貔虎
苞有三孽怙勢悖恩默運神機載奠乾坤旆麾烽熄弩

指鯨奔提封式廓截海為藩元裔速辜不修厥職禁旅
一臨允渠伏誣羅刹擾邊邊帥討賊拔城縱俘感恩懷
德維彼雄梟構難比隣比隣內附稽顙稱臣敢抗明詔
怙惡不悛

天子三征掃蕩邊塵蠢茲遺孽構氛西徼自恃荒遐狂跳
縱暴堂堂天兵何幽不到底定三危恩同再造瑤池之
水崑崙之岡窮域絕漠越海踰洋書傳所記咸我版章
敷天率土無不來王睠念河淮頻乘四載既安二瀆亦

通百派一授成功萬世永賴胥樂憂同仁膏遍沛周詩
時邁虞典歲巡省方詢俗輦路生春蠲租賜復歲有恩
綸惠心溥渥益道平均暘雨偶愆恩澤已布朔漢朝鮮
同霑膏露象魏既懸鷄竿屢樹貫索其空桁楊可厝德
惟善政道在遺經紆御東魯親奠兩楹禮明樂備檜柏
增榮光華復旦天下文明覃心四府研精儒術典籍大
興英髦踵出爰在璣衡協時正日玉振金聲審音調律
海涵地負大哉王言鸞鵞鳳翥煥乎宸翰文經武緯異

用同源道高能博藝備德尊歷代帝王祀典彌厚備列
几筵光延籩豆修敬前朝親臨鍾阜三恪垂封烝嘗有
後功勲耆舊恩禮優容龐眉皓首濟濟雍雍撝謙克讓
川受谷冲穆穆其敬安安其恭六幕啟宇八垓肇域維
我

皇考憂勞靡極三靈集祐五紀膺歷維我

皇考兢勤不息貽我臣庶食德難忘貽我子孫卜世無疆

昌瑞之山峰峙川長功德穹碑天日同光先是以


景陵建

聖德神功碑遣大學士工部欽天監堂官相度立碑方位
諭諸臣曰

世祖章皇帝碑文字似小

聖祖仁皇帝在位六十餘年功德隆盛文章字數甚多一
碑不能盡載建立二碑一刻清字一刻漢文其碑若比
世祖章皇帝碑亭寬展恐有未安即或加寬必不可加高
爾等詳議具奏尋議應依

孝陵碑亭之式建立二碑俟鐫刻告成擇吉建立從之



皇朝文獻通考卷一百五十一